

পরিচ্ছেদ ২৪

যোজক

পদ, বর্গ বা বাক্যকে যেসব শব্দ যুক্ত করে, সেগুলোকে যোজক বলে। যেমন – এবং, ও, আর, অথবা, তবু, সুতরাং, কারণ, তবে ইত্যাদি।

বৈশিষ্ট্য অনুযায়ী যোজককে নিম্নলিখিত শ্রেণিতে ভাগ করা যায়:

১. সাধারণ যোজক: এ ধরনের যোজক দুটি শব্দ বা বাক্যকে যোগ করে। যেমন –

রহিম ও করিম এই কাজটি করেছে।

জলদি দোকানে যাও এবং পাউরুটি কিনে আনো।

২. বিকল্প যোজক: এ ধরনের যোজক একাধিক শব্দ বা বাক্যের মধ্যে বিকল্প নির্দেশ করে। যেমন –

লাল বা নীল কলমটা আনো।

চা না-হয় কফি খান।

৩. বিরোধ যোজক: এ ধরনের যোজক বাক্যের দুটি অংশের সংযোগ ঘটায় এবং প্রথম বাক্যের বক্তব্যের সঙ্গে বিরোধ তৈরি করে। যেমন –

এত পড়লাম, কিন্তু পরীক্ষায় ভালো করতে পারলাম না।

তাকে আসতে বললাম, তবু এল না।

৪. কারণ যোজক: এ ধরনের যোজক বাক্যের দুটি অংশের মধ্যে সংযোগ ঘটায় যার একটি অন্যটির কারণ। যেমন –

জিনিসের দাম বেড়েছে, কারণ চাহিদা বেশি।

বসার সময় নেই, তাই যেতে হচ্ছে।

৫. সাপেক্ষ যোজক: এ ধরনের যোজক একে অন্যের পরিপূরক হয়ে বাক্যে ব্যবহৃত হয়। যেমন –

যদি রোদ ওঠে, তবে রওনা দেব।

যত পড়ছি, ততই নতুন করে জানছি।

অনুশীলনী

সঠিক উত্তরে টিক চিহ্ন (✓) দাও।

১. যোজক কাকে যুক্ত করে?

ক. পদ খ. বর্ণ গ. বাক্য ঘ. সবগুলো

২. বিরোধ যোজক আছে কোন বাক্যে?

ক. সংখ্যাটি সতেরো কিংবা আঠারো হবে।

খ. লোকটি শিক্ষিত, তবে সৎ নন।

গ. যখন বৃষ্টি থাকল, তখন সবাই রওনা হলাম।

ঘ. দুবার বলেছি, ফলে তৃতীয় বার বলার প্রয়োজন বোধ করিনি।

৩. কোন যোজক কার্যকারণ দেখাতে দুটি বাক্যের মধ্যে সংযোগ ঘটায়?

ক. সাধারণ যোজক খ. বিকল্প যোজক গ. কারণ যোজক ঘ. বিরোধ যোজক

৪. কোন যোজক একে অন্যের পরিপূরক হিসাবে বাক্যে ব্যবহৃত হয়?

ক. কারণ যোজক খ. বিকল্প যোজক গ. সাপেক্ষ যোজক ঘ. কারণ যোজক

৫. “যদি রোদ ওঠে তবে রওনা দেবো” – বাক্যটি কোন যোজক নির্দেশ করেছে?

ক. সাধারণ যোজক খ. বিকল্প যোজক গ. বিরোধ যোজক ঘ. সাপেক্ষ যোজক